

Ka Shithi U Jakob

1 ¹Ka jingkhubei na u Jakob, u shakri jong U Blei bad U Jisu Khrist uba U Trai, sha ki bangeit na ki khatar jait Israel ia kiba la pynsakma kylleng ka pyrthei.

Ka Jingngeit Bad Ka Jingstad

²Ko parabangeit, to phin ñiew ka jingkmén haba phi mad ia ki jingeh ba bunjait. ³Haba phi tip ba kata ka jingtyñjuh ia ka jingngeit jong phi, ka wanrah ia ka jingiaishah wat hapdeng ki jingjynjar. ⁴Lada phi ailad ba kata ka jingiaishah kam trei hapoh jong phi, ka jingmih nangta kan long kaba bha bad phin nangsán sha ka jinglong rangbah ba pura. Te phin sa long kumba U Blei u kwah ia phi ban long.

⁵Don uno uno na phi uba donkam ka jingstad? To un pan ia ka na U Blei, uba sbun bad uba ai da kaba kmén sha baroh. Te un ai ha ki khlem da kynnoh bein. ⁶Hynrei haba phi pan na U Blei, phi dei ban ngeit. Wat artatien ia u, namar uta uba artatien u long kum ka jingatphyllung ha duriaw kaba shah kynting shane bad shatai ha ka lyer. ⁷⁻⁸Ki briew kiba kum kita ki long ar-jingmut bad kim nang ban shim rai kumno ban leh. Kumta kim lah ban khmih lynti ba kin iohpdang ei ei na U Trai.

Ki Spah Bashisha

⁹Ki parabangeit kiba duk ki dei ban sngewkmén namar U Blei u ñiew kor ia ki. ¹⁰Ki parabangeit kiba riewspah ki dei ban sngewkmén haba kiei kiei kiba sniew ki wan jia ha ki khnang ban pynsngewrit ia ki. Ka spah jong ki kan ym lah ban iada na ka jingpynjot kaba wan lap kynsan kum ia u syntiew u phlang. ¹¹Katba ka sngi ka dang shit kyrang, ka jingkhluit jong ka kan pyntyrkhong noh ia ki jingthung bad ki syntiew kiba itynnad ki tlor bad ki iap noh. Kumta ruh ka long bad kiba riewspah, katba ki dang ia pyrkhath ia ki kam jong ki, kin iap noh.

Ka Jingpynshoi Kam Long Na U Blei

¹²Ka jingkyrkhu bakhrav ka long ia kita kiba iaíneh skhem wat hapdeng ki jingpynshoi! Hadien ba ki la jop ia ki jingpynshoi U Blei un ai ha ki ia ka pansngiat jong ka jingim kaba u la kular

ha kita kiba ieid ia u. ¹³Man ba phi shah pynshoi ban leh ia kiei kiei kiba sniew, phim dei ban ong, “U Blei u pynshoi ia nga.” Ym lah ban pynshoi ia U Blei da kaba sniew bad um pynshoi ma u iano iano ruh. ¹⁴Hynrei la pynshoi ia phi haba la ringpah da ki jingkwah brai jong phi hi kaba ialam bakla bad riam ia phi. ¹⁵Ka jingkwah brai haba ka la san hapoh jong phi ka pynkha ia ka pop, nangta ka pop haba ka la san khatduh eh ka pynkha ia ka jingiap keiñ.

¹⁶Ko parabangeit baieid, wat long kiba bieit shaphang kane. ¹⁷Kiei kiei kiba bha baroh ki wan na U Blei bad ki jingai bajanai baroh ki long na U Kpa ka jingshai u bym don ka jingkylla kum ka syrgiew kaba shat da ki jingkylla. ¹⁸U Blei u la ibit ban ai ha ngi ia ka jingim lyngba ka khubor jong ka jingshisha kaba u la phah sha ngi. Uba mon ba ngin long ki kynja soh nyngkong napdeng ki jingthaw jong u baroh.

Ka Jingshahshkor Bad

Ka Jingkohnguh

¹⁹Ko para baieid, borabor to long kiba kloí ban shahshkor ban ia kaba kren. To tehlakam ia ka jingbitar jong phi. ²⁰Namar ka jingbitar kan ym iarap ia phi ban pyndep ia ka hok U Blei. ²¹Kumta to bret noh ia ki jingbymman baroh na ka jingim jong phi kiba phi ju leh. To long kiba sngewrit bad kiba pdiang ia ka jinghikai U Blei ia kaba la pynsuhthied ha ki dohnud jong phi kaba lah keiñ ban pynim ia phi.

²²To long phi ki nongleh ia ka ktien te ym tang ki nongsngew, da kaba shukor noh ialade. ²³Kaba iohsngew ia ka ktien U Blei bad khlem leh ei ei ka long thik kumba peit ia ka dur khmat ha ka it khmih ²⁴bad khlem da leh ei ei pat ia kaei kaba phi iohi. Phi leit noh bad khala khala phi klet noh uba kumno phi long. ²⁵Hynrei uta uba khmih sha ka hukum bajanai, lada u leh ia kaba la ong bad ban ym klet noh ia kaba u la iohsngew, uta keiñ un iohpdang ia ki jingkyrkhu ha kaei kaba u leh.

Ka Jingmane Blei Bashisha

²⁶Phi lah ban pyrkhath ba phi long u briew uba riewblei, hynrei lada phim lah ban tehlakam ia la u thylliej, phi shukor noh ia la ka dohnud bad ki jinganguh jong

phi sha U Blei kim don jingmut satia.²⁷ Ka jingmane kaba U Blei u pdiang sngewbha ka long kane keiñ: ka jingsumar ia ki khunswet bad ia ki riewrynthei ha ka jingshitom jong ki bad ban ki ialade na ka bor bymman jong kane ka pyrthei.

To Ieid Kumjuh Ia Ki Brier Baroh

2¹Ko parabangeit baieid, phi long ki bangeit ha U Trai jong ngi U Jisu Khrist uba dap da ka burom, kumta wat ñiew shiliang khmat iano iano ruh.² Shu buh lada wan rung ha ka jingiaseng jong phi uba phong ia ki jaiñ itynnad kiba remdor bad ki jingdeng ksiar, ha kajuh ka por u wan rung u brier uba duk uba phong da ki jaiñ rim bajot.³ Phi kham kitkhia bha ia uta uba riam bha. Phi ong, “Shong hangne ha ka jaka babha.” Hynrei ia uta uba duk pat phi ong, “feng hangne!” lane

“Shong ha madan hapoh ki kjat jong ngi!”⁴ Hato kane kam pyni ba phi ñiew shiliang khmat? Phi pynlong ialade ki nongbishar kiba don ki jingpyrkhat basniew.

⁵To sngew, ko parabangeit baieid. U Blei u la jied ia ki brier baduk ha kane ka pyrthei ban long kiba riewspah ha ka jingngeit. U la jied ia ki ban iohpdiang ia kata ka hima kaba U Blei u la kular ha kito kiba ieid ia u.⁶ Hynrei phim shym la burom ia kito kiba duk bad phi tip ba dei kiba riewspah pynban kiba pyrshang ban khniot bein ia phi bad dei ma ki, kiba ring ia phi sha ka iingbishar.⁷ Bad dei kine kiba kren bein ia ka kyrteng baphylla tam U Khrist, ha kyrteng da kaba la ithuh ruh ia phi.

⁸Kawei ka hukum kaba long halor ia ki hukum baroh. Kane ka hukum ba kongsan kaba ngi shem ha ki Jingthoh Bakhuid: “Men ieid ia u para marjan jong me kumba me ieid ialade.” Lada phi kohnguh ia kane ka hukum, phi leh ia kaba dei keiñ.⁹ Hynrei lada phi ñiew shiliang khmat, te phi leh pop keiñ. Phi long kiba rem namar phi la pynkheñ ia ka hukum.

¹⁰Namar lada phi la pyndep lut ia baroh ki hukum, hynrei phi pynkheñ tang ia kawei ka hukum, phi long kiba rem noh na ki hukum baroh.¹¹ U Blei uba ong, “Wat klim” u ong ruh, “Wat pyniãp.” Kumta lada phim klim, hynrei phi pyniãp, phi long kiba la rem namar phi la pynkheñ ia ka hukum baroh kawei.

¹²Yn bishar ia phi da ka hukum ka jingpyllaituid, phi dei ban kynmaw ia kane ha man ki jingkren bad jingleh jong phi.¹³ Hooiid, phi dei ban pyni ia ka jingleh

isynei sha kiwei, lym kumta U Blei ruh un ym leh isynei haba u bishar ia phi. Hynrei uta uba leh isynei u lah ban ieng khlem jingsheptieng hakhmat u nongbishar.

Ka Jingngeit Bad Ka Jingleh

¹⁴Ko parabangeit, lada uno uno u kam ba u don ka jingngeit hynrei um leh ei ei pat, kata ka jingngeit ka long ka bym don jingmut ei ei bad kam lah ban pynim iano iano ruh.¹⁵ Shu buh lada wan sha phi u para ne ka parabangeit ha U Khrist kiba donkam ia ka jaiñphong ne ka jingbam ban bam.¹⁶ Bad phi ong sha ki, “U Blei un long lem bad phi! Nga kyrmen ba phi syaid bad phi ioh pahuh ka bam,” hynrei phim ai ha ki ia kata kaba ki donkam. Lada phim iarap ia ki, ki ktien jong phi kim myntoi ei ei ruh em.¹⁷ Ka long kumjuh ruh bad ka jingngeit, lada kam don ka jingleh kata ka jingngeit ka long kaba iap.

¹⁸Hynrei don ki ban pynksan, “Don ki brier kiba don ia ka jingngeit bad kiwei pat ki don ia ki jingleh.” Ka jubab jong nga ka long ba phim lah ban pyni ia ka jingngeit jong phi lada phim leh ei ei, hynrei ngan pyni ia ka jingngeit jong nga ha phi da ki kam babha jong nga.¹⁹ Phi ngeit ba don uwei U Blei, kata ka bha eh, wat ki ksuid ruh ki ngeit ia kata bad ki kyjuh ruh da ka jingsheptieng!

²⁰Ah phi kiba bieit! Ka jingngeit kaba khlem ka jingleh kam don jingmut. Hato phi kwah ba ngan pynshisha ia kane ha phi?²¹ U kpa jong ngi u Abraham u la long uba hok da ki jingleh jong u, mynba u la kñaia ainguh ia u Isaak u khun jong u ha kata ka duwan.²² Te phi iohi ia ka jingngeit u Abraham bad kaei kaba u leh ki iatrei lang. La pynjanai ia ka jingngeit jong u da ki kam kiba u la leh.²³ Kane ka pyni ia ka jingmut ba pura jong ka Jingthoh Bakhuid kaba ong, “U Abraham u la ngeit bad ha ñiew ka hok” ia kata ha u bad la khot ruh “U paralok jong U Blei” ia u.²⁴ Kumta phi iohi kumno ba la pynksan ia ki brier hakhmat jong U Blei da ki kam jong ki, ym tang da ka jingngeit.

²⁵Sa kawei ka nuksa ka dei ka Rahab kaba long ka nuti ia kaba la pynksan da ki kam kiba ka la leh. Ka la iarap ia kito kiba la wan syntiat na ka bynta ki brier jong U Blei. Ka la pdiang sngewbha ia ki sha la iing bad ka la pyllait im ia ki da kaba phah ba kin leit na kawei pat ka lynti.

²⁶Ka met u brier kaba khlem ka mynsiem ka long kaba iap. Kumjuh ruh ka jingngeit khlem ka jingleh ka long kaba iap!

Tehlakam İa La U Thylliej

3¹Ko parabangeit, ym baroh na phi ki long ki nonghikai. Nga ong İa kane namar kumba phi hi phi İa tip, ngi kiba hikai ngin İoh İa ka jingbishar kaba kham khraw ban İa kiwei pat.

²Ngi baroh ngi don la ki jingduna, hynrei u briew u bym jynthut ha ka ktien u long u briew uba janai, uba lah ban synshar İa ka met baroh kawei. ³Ngi pyndait lakam ha ka shyntur ki kulai, khnang ba kin kohnguh İa ngi. Da kine ki lakam ngi lah ban pynphai İa ka met jong ki baroh kawei. ⁴Ka long kumjuh ruh bad ki lieng, İa ki heh katta katta bad shah kynting ha ki jingat phyllung, pynban tang da i boitha barit İa lah ban pynphai İa kata ka lieng kaba heh kat shaba mon u maji. ⁵Ka long kumjuh bad u thylliej jong ngi, İa u long u dkhot uba rit ha ka met, hynrei borabor u kren meng.

Ka jingpluh ha ka 'lawbah ka sdang na i phylliah ding barit. ⁶U thylliej u long kum ka ding, u long ka pyrthei jingbymman hapdeng ki bynta jong ka met jong ngi. Ka pynsaphriang İa ka jingsniew ha baroh kawei ka met bad ka wiang ding İa ka jingim baroh kawei. Ka dei ka ding kaba na dujok hi.

⁷Ki briew ki donbor ban pynjuh İa baroh ki jait mrad khlaw bad ki sim, ki mrad ba par bad kiba ha ka duriaw ruh. ⁸Hynrei ym don ba lah ban pynjuh İa u thylliej, u long uba sniew bad ba bymman, uba dap da ka bih ba pyniap. ⁹Ngi pyndonkam İa u thylliej jong ngi ban İaroh İa U Trai bad U Kpa jong ngi, hynrei da ujuh ngi tim ruh İa ki briew kiba İa thaw ha ka jingİasyriem İa U Blei. ¹⁰Kine ki jingİaroh bad ki jingtim ki mih na kajuh ka shyntur, ko parabangeit kam dei ban long kumta. ¹¹Hato ka um kaba shngiam bad ka um mluh ki kyrsoi na kajuh ka tyllong? Da lei lei ruh em. ¹²Ko parabangeit, hatu u dieng dumbur u lah ban pynmih İa ki soh olib? Ne u dieng sohwaiñ u lah ban pynmih İa ki soh dumbur? Kata ka bym lah ban long. Kumjuh ruh ka tyllong um mluh kam lah ban pynmih İa ka um kaba shngiam.

Ka Jingstad Bashisha

¹³Hato don napdeng jong phi kiba stad bad kiba shemphang shisha? To phiin pynpaw noh İa kata ka jingstad jong phi da ka jingim kaba beit. Phi dei ban leh İa kaba bha da ka jingsngewrit. U briew uba stad um ju leh sarong. ¹⁴Lada phi long kiba khwan myntoi bad kiba dap da ka jingpuihuiñ bakthang ha ka dohnud jong phi, phim don daw ban kob sarong. Ka jingsarong jong phi ka long tang ka jingshukor ban tap İa ka jingshisha. ¹⁵Kaba kum kata ka jait "jingstad" kam dei kaba wan

na U Blei, hynrei na ka pyrthei keiñ, kam long kaba kynja mynsiem, hynrei kaba kynja ksuid. ¹⁶Haba don ka jingbishni bad ka jingpuihuiñ, hangta don ka jingkhiiwin bad baroh ki jingleh basniew. ¹⁷Hynrei ka jingstad kaba wan na U Blei ka long kumne: Nyngkong, ka long kabasngur, kaba suk, kaba jaijai bad kaba lah ban pynsngewbha. Kane ka jingstad ka long borabor kaba kloj ban İarap İa ki briew kiba don hapdeng ka jingeh bad ban leh bha ruh İa kiwei khlem jingñiew shiliang khmat bad khlem jingsarsap. ¹⁸Ki briew kiba trei na ka bynta ka jingsku da ka lynti kaba suk ki İoh İa ki jingkyrkhu kaba wan na ka jingim hok jong ki.

Aiti İalade Sha U Blei

4¹Nangno ki mih ki jingİaleh bad ki jingİania hapdeng jong phi? Hato ym dei na ki jingkwah brai kiba İaleh thma hapoh jong phi hi? ²Phi kwah eh İa kiei kiei, hynrei phim İoh İa ki. Kumta phi pyniap bad phi puihuiñ İa kiwei, hynrei İa katta ruh phim İoh İa kaba phi kwah. Kumta phi İania bad phi İaleh jubor, hynrei phim İoh namar ba phim shym pan na U Blei. ³Haba phi pan ruh, phim İohpdiang ei ei, namar ba phi pan bymdei khnang ba phin İoh pyndonkam İa ka tang na ka bynta ka jingkwah brai jong phi hi.

⁴Phi ki briew ki bym İaieñ ha U Blei!^a Phi dei ban tip haba phi İeid İa ki jong ka pyrthei ka long kumjuh kumba phi isih İa U Blei. Kumta uno uno uba kwah ban İalang lok bad ka pyrthei ba bymman u kylla long u nongshun jong U Blei. ⁵Hato phi tharai ba ka jingthoh Bakhuid ka shu ong lehnohe? "U Mynsiem ba U Blei u İa buh hapoh jong ngi u pynkwah ba ngin im tang na ka bynta jong u hi." ⁶Hynrei u ai İa ka jingİaieñ kaba khambun, kumba ka jingthoh Bakhuid ka ong, "U Blei u İaleh pyrshah İa kiba sarong, hynrei u ai ka jingİaieñ İa kiba sngewrit."

⁷Kumta to pynkohnguh İalade ha U Blei, hynrei İaleh pyrshah İa u Soitan, te un phet İap noh na phi. ⁸To wan hajan İa U Blei te un wan hajan İa phi. To pynkhuid noh İalade phi kiba pop bad kiba synrop ha ka jingmut jingpyrkhat. ⁹To sngewsih, to sngew babe bad to İam! Pynkylla noh İa ka jingrkhie jong phi sha ka jingİam bad İa kata ka jingkmien jong phi sha ka jingsngewsih. ¹⁰To pynrit İalade hakmat U Trai, te un pynkhraw İa phi.

Phim Dei U Nongbishar

¹¹Ko parabangeit, wat kren sniew pyrshah İano İano ruh. Lada phi kren pyrshah İa İa

^a 4:4 Ha ka ktien Grik, "Phi kiba klim."

u parabangeit ne phi bishar ia ki, phi kren pyrshah keiñ ia ka hukum bad haba phi bishar ia ka hukum, phim long u nongleh ia ka hukum, hynrei u nongbishar. ¹²U Blei tang ma u hi, uba la ai ha ngi ia ka hukum u long u nongbishar, uba lah ban pynim bad ban pynjot. Kumta phi long kiei ba phi bishar ia kiwei pat?

Ai Ba U Blei Un İalam İa Ka Jingim Jong Phi

¹³Don na phi kiba ong, “Mynta ka sngi ne lashai ngin İaleit sha kata ka nongbah. Ngin sah hangta shisnem, ngin İa khañ bad ngin İa kamañ spah.” To sngap, da pyrkhath bha İa kane: ¹⁴Phim tip kaei ka ban jia ha kaba lashai. Ka jingim jong phi ka long kum u lyoh uba phi lah ban İohi mynta, hynrei tang shipor u jah noh. ¹⁵Kumta phi la dei ban ong, “Lada U Trai u mon, ngin im bad ngin leh İa kane ne İa katai.” ¹⁶Hynrei mynta phi kren sarong bad phi kren kob shaphang İalade, kaba kum kata ka jingkreng kob ka long kaba bakla. ¹⁷Lada phim leh İa kata kaba phi tip ba ka dei kaba bha, phi leh pop keiñ.

Ka Jingmaham İa Kiba Riewspah Bad Kiba Khwan Myntoi

5 ¹Phi kiba riewspah, to shahshkor! To İam bad to sngewisih namar ka jinglanot khop kan sa wan lap İa phi. ²Ki spah jong phi kin pyut noh bad ki jaiñkup jong phi kin sa bam kñhiang. ³Ka ksar bad ka rupa jong phi kan sa bam sarang, te kata ka jingsarang kan long ka sakhi pyrshah İa phi bad kan bam duh İa ka doh jong phi kum ka ding. Phi la lum spah ha ki sngi kiba khatduh. ⁴Ki briew ki trei ha ki lyngkha jong phi, hynrei phim ju siew bainong İa ki. Ki İakyang lynñiar jam pyrshah İa phi. Ki la rep shitom İa ki jingthung jong phi. Mynta U Trai badonbor baroh u la sngew İa ka jinglynñiar jong ki.

⁵Ka jingim jong phi ha pyrthei ka la long kaba pahuh pahai. Phi pynsngewbha İalade da ki jingkwah ba har rukom jong phi. Phi la pynsngaid bha İalade, kum u mrad ba la pynkreh na ba bynta ka sngi ban shohdoh. ⁶Phi la pynrem bad pyniap İa ki briew kiba hok, pynban ki bym shym la İaleh pyrshah İa phi.

To Long Kiba İaishah

⁷Ko parabangeit, to long kiba İaishah haduh kata ka jingwan U Trai. Hakhmih İa u nongrep uba ap da ka jingİaishah İa uta u jingthung ba un san bad pynmih İa u soh bakordor jong u, da kaba ap shah slem İa u slap banyngkong bad bakhatduh. ⁸Phi ruh to

long kiba İaishah bad kiba ap kyrmen, naba ka jingwan U Trai ka la jan. ⁹Ko parabangeit, wat mudui pyrshah İano İano ruh ba yn ym bishar pynrem İa phi, namar hakhmih uta u nongbishar u la jan ban wan!

¹⁰Ko parabangeit, to pyrthuh bud İa ka jingshah shitom bad ka jingİaishah jong ki nongİathuhlypa kiba kren ha ka kyrteğ U Trai. ¹¹Bad ngi ong ba kito kiba mad İa ki jingjynjar lem bad ka jingİaishah mynta kin İoh mad İa ki jingkyrkhu U Blei. Phi la İohsngew shaphang ka jingİaishah u Job bad phi tip hadien kita ki jingeh baroh, U Trai u la kyrkhu İa u. Kane ka pyni ba U Trai u long uba kynrei ka jingsisynei bad uba leh sbun.

To Sumar Bha İa Kaei Kaba Phi Kren

¹²Ko parabangeit, haba phi pynlong ka jingkular to wat smai da ka bneng lane ka khyndew lane da kaei kaei ruh ban pynshisha İa kata ka jingkreng jong phi. Hynrei to ai kaba hood jong phi kan long “hood” bad kaba em jong phi kan long “em,” ba kumta phin ym leh pop bad ngat ha ka jingpynrem.

Ka Bor Jong Ka Jingduwai

¹³Hato phi don hapdeng ki jingshitom? To phin duwai. Hato phi sngew kmen? To phin rwai İaroh. ¹⁴Hato phi don hapdeng ka jingpang? To khot İa ki basan jong ka balang ba kin wan bad pynsleh İa phi da ka umphniang ha ka kyrteğ U Trai bad kin duwai ruh na ka bynta jong phi. ¹⁵Te ka jingduwai jong ka jingngeit kan pynkhiyah İa uta uba pang bad lada u la leh pop U Trai un mab bad un pynieng pat İa u.

¹⁶Kumta to İaphla noh paralok hi İa la ki jingpalat bad to İa duwai markylliang khnang ba U Blei un İoh ban pynkhiyah İa phi. Ka jingduwai minot uba hok ka lah shibun. ¹⁷U Elijah u long u briew kum ma ngi hi, haba u la duwai ba kan ym hap slap te kam shym la hap slap ha ka khyndew kumba lai snem shiteng! ¹⁸Bad haba u la duwai pat ka bneng ka la ai İa u slap bad ka khyndew ka la pynmih İa ki jingthung.

İarap İa Ki Briew Haba Ki Hap Ha Ka Pop

¹⁹Ko para, lada don mano mano hapdeng jong phi kiba İaid sakma na ka jingshisha bad don mano mano ba İarap ban pynphai biang İa uta u briew, ²⁰to kynmaw İa kane: ba uta uba pynphai biang İa u nongpop na ka lynti ba bakla u pyllait im İa ka mynsiem na ka jingİap bymjukut bad yn mab ruh İa kiba bun byllien ki pop.